

suo etiam loco, & de studijs discentium bene mereretur, & publicam promoueret utilitatem, vir prudens et integerrimus SAMUEL SELFISCH, exhibita praeterito semestri noua editione tabularum primi mobilis Ioannis Regiomontani, nunc hasce etiam secundorum motuum tabulas excudi denuò impensis suis voluit. Et quo σφάλματα quædam, quæ in exemplaria priora typographorum incuria irrepserunt, corrigerentur, quantumq; fieri posset emendatio in lucem hæc noua prodiret editio, mibi imponi laborem inspiciendi & emendandi typographi in excudendis hisce tabulis operas sum passus: qua in re quid præstitum à nobis sit, eorum qui deinceps hisce utentur canonibus iudicio permittimus, solummodo candorem y ut adhibeant & benevolentiam rogantes. Gratiam igitur habebunt studiosi huic viro, eiusq; voluntatem ad iuuanda liberalia studia propensam agnoscere: simul etiam operam dabunt, ut accessione mediocris cognitionis doctrinæ huius de motibus cœlestibus, sine qua, Platone teste, reliqua Philosophia manca est & imperfeta, liberalem suam eruditionem auctiorem reddant. In primis vero ad usum transferre Astronomicas hypotheses in calculo & numeratione motuum, ex his & similibus tabulis, ac hoc modo extremum artis huius & finem doctrinæ de astrorum motibus assequi studeant.



Casper Strubius D.